

《心經詞釋》

多羅那他 著

石美 譯

己六、通達處與非處之修學

〔經：無智、無得，亦無不得。（唐·法成譯）〕

即於空性智上，無道上之智，亦無藉彼之出離。諸事物於因果階段無有所得，因無因，果位亦不可得。彼等要義應如是而持。

輪迴諸衆生以及一切修道者，於法界色等基位法迷亂，並現起各種道上及果位法之顯現，未見彼實相真實面目。因而基、道一切顯現雖無實有但有顯現，於聞思階段如彼抉擇後，以修習而知，由「色蘊」到「無得」之間一切法於明覺自性（rig pa i ngo bo）上自然安立（rang sang du blang），教授需於彼自性空性智上入等持。

說三無自性¹即與此要點一致。說彼三之成立義（grub don）亦於勝義界上真實安住，僅客生世俗（glo bur kun rdzob）空故。因而有些說法認為彼二者相違，實為未理解的自負而已。

如是，彼六者中，於蘊界處三者修學，可通達法性性相；於緣起和四諦修學，可通達進退取捨；於處與非處修學，可通達因緣及果。

¹即相無自性、生無自性、勝義無自性。

菩薩善戒經 卷第九

宋罽賓三藏求那跋摩譯

畢竟地行品第四

菩薩摩訶薩住於解地乃至菩薩地，有四行：一者波羅蜜行，二者菩提行，三者神通行，四者熟眾生行。波羅蜜行者，六波羅蜜如先說。方便波羅蜜、願波羅蜜、力波羅蜜、智波羅蜜，是十波羅蜜，是名波羅蜜行。

善方便有十二種，如先說，是名方便波羅蜜。願有五種，如先說，是名願波羅蜜。十力莊嚴淨，是名力波羅蜜。知一切法是處非處，名智波羅蜜。知世諦故，名智波羅蜜。知第一義諦，名般若波羅蜜。

復次，無量智者，名方便波羅蜜。求勝勝智，名願波羅蜜。不為四魔之所障故，名力波羅蜜。能知諸法真實性故，名智波羅蜜。

【經文資訊】大正藏第 30 冊 No. 1582 菩薩善戒經

佛說四品法門經

西天譯經三藏朝奉大夫試光祿卿明教大師臣法賢奉 詔譯

如是我聞：

一時，佛在舍衛國祇樹給孤獨園，與大眾俱。

爾時，尊者阿難獨止靜室，心生是念：

「世間有情，所有驚怖，乃至災害、障難、疾病、過咎。已生、當生者，皆是愚人所有；智者即無。」

尊者阿難思惟如是事已，從座而起，往詣佛所。到佛所已，頭面禮足，修奉已畢，住立一面，而白佛言：

「世尊！我獨靜室，心生是念：『世間所有驚怖等事，皆是愚人所有；智者即無。』惟願世尊，為我解說。」

佛告阿難：

「汝今諦聽，當為汝說。」

阿難白言：

「唯然。世尊！願樂欲聞。」

佛言：

「阿難！如是世間所有驚怖等事，已生、當生，所謂災害、障難、疾病、過咎等，皆是愚人所有；智者即無。阿難！譬如有人堆積乾葦為火所燃，而彼愚人驚怖等事，亦復如是。阿難！如是過去、未來、現在世中，愚人有災害，智者無災害；愚人有障難，智者無障難；愚人有疾病，智者無疾病；愚人有過咎，智者無過咎。阿難！當知是愚人法，是智者法，知彼愚人法已，當可遠離行智者法。如是，阿難！汝應當學。」

阿難白佛言：

「世尊！何名愚人？」

佛告阿難：

「愚人者，愚為不了。世間愚人，於法不了，故名為愚。不了者何？不了法境有四品類，所謂不了界法、不了處法、不了緣起法、不了處非處法。阿難！於如是法，不能了達，是故得名為愚人也。」

阿難白言：

「世尊！如是，如是。不了四法，得名愚人。又復云何得名智者？」

佛告阿難：

「言智人者，於法揀擇，善了是非，故名智人。善了者何？善了法境，亦四品類，所謂善了界法、善了處法、善了緣生法、善了處非處法。善能了知如是等法，是故得名為智人也。」

阿難復白佛言：

「善了此法，得名智者。而此智者，了何界法？」

佛告阿難：

「汝能善問，當為汝說。言界法者，而有多種，所謂眼界、色界、眼識界；耳界、聲界、耳識界；鼻界、香界、鼻識界；舌界、味界、舌識界；身界、觸界、身識界；意界、法界、意識界。如是十八界，彼智者，如實了達。」

「復有六界，所謂地界、水界、火界、風界、空界、識界，如是六界，彼智者，如實了達。」

「復有六界，所謂喜界、樂界、苦界、捨界、煩惱界、無明界，如是六界，彼智者，如實了達。」

「復有六界，所謂貪欲界、瞋恚界、不瞋界、殺害界、不殺界、出離界，如是六界，彼智者，如實了達。」

「復有四界，所謂受界、想界、行界、識界，如是四界，彼智慧者，如實了達。」

「復有三界，所謂欲界、色界、無色界，如是一切，彼智慧者，如實了達。」

「復有三界，所謂下界、中界、上界，如是一切，彼智慧者，如實了達。」

「復有三界，所謂善界、不善界、無記界，如是一切，彼智慧者，如實了達。」

「復有三界，所謂有學界、無學界、學無學界，如是一切，彼智慧者，如實了達。」

「復有二界，所謂有漏界、無漏界，如是一切，彼智慧者，如實了達。」

「復有二界，所謂有為界、無為界，如是一切，彼智慧者，如實了達。」

「阿難！如是等界，諸有智者，善能了達。」

阿難白佛言：

「世尊！彼智慧者，如是了達諸界法已，又復云何，了達處法？」

佛告阿難：

「言處法者，謂十二處：眼處、色處、耳處、聲處、鼻處、香處、舌處、味處、身處、觸處、意處、法處。此十二處，智慧之者，如實了達。」

阿難白佛言：

「世尊！智者如是了達十二處已，又復云何了緣生法？」

佛告阿難：

「智者應知，十二緣法，從因緣起，由因緣故，即有諸法。因緣者何？所謂無明緣行，行緣識，識緣名色，名色緣六處，六處緣觸，觸緣受，受緣愛，愛緣取，取緣有，有緣生，生緣老死、憂悲、苦惱，如是即一大苦蘊集。若了如上緣生之法，因緣性空，緣聚即有，緣散即無；緣法無故，即無諸法。所謂無明滅即行滅，行滅即識滅，識滅即名色滅，名色滅即六處滅，六處滅即觸滅，觸滅即受滅，受滅即愛滅，愛滅即取滅，取滅即有滅，有滅即生滅，生滅即老死憂悲苦惱滅，如是即一大苦蘊滅。如是生滅之法，智者應當如實了達。」

阿難白佛言：

「世尊！彼智慧者，於緣生法，如實知己，復云何了處非處法？」

佛告阿難：

「非處法者，謂身、口、意造不善業，而獲所樂善果報者，無有是處。若身、口、意造諸善業，而復獲於不善報者，亦無是處。

言是處者，謂身、口、意造諸善業，而獲所樂勝妙果報，斯有是處。若身、口、意造不善業，而獲所感不善果報，亦有是處。

「又復，阿難！

言非處者，謂身、口、意造不善業，如所希求殊勝之果，由此因緣，命終之後，若生人天，無有是處。若身、口、意造於善業，墮惡趣者，亦無是處。

言是處者，謂身、口、意造諸善業，生人天者，斯有是處。若造惡業，墮惡趣者，亦有是處。

「又復，阿難！

世間若有二佛出世，無有是處。一佛出世，斯有是處；又復世有二輪王出，亦無是處。一輪王出，斯有是處。如是若有女人，為轉輪王，治化世間，乃至為彼四王天主、忉利天主、大梵天王，及成緣覺無上菩提者，如是等事，無有是處。

若有善男子，具大人相，福慧莊嚴，為轉輪王，出於世間，乃至得成無上菩提，斯有是處。

「又復，阿難！

若正見人，殺父、害母、殺阿羅漢、破和合僧、出佛身血，造於如是五逆業者，無有是處。若異生凡夫愚癡邪見，造五逆者，斯有是處。

「又復，阿難！若正見人，受具戒品，自犯戒已，於阿闍梨而生毀謗，作如是言：『此阿闍梨不善戒法，亦復不能受持禁戒，我當揀擇別阿闍梨，受學戒法。』作是言已，詣餘沙門婆羅門所，選擇師受彼人，或見沙門婆羅門，作諸戲論，不律儀者，依稟於彼為阿闍梨，而求寂靜出離三有，無有是處。如是等事，若愚癡邪見，作此求者，斯有是處。

「又復，阿難！若人不斷根本煩惱及隨煩惱，由煩惱故損減善根，障礙智慧，覆蓋涅槃真寂靜法。彼人若了四念處者，無有是處。若人斷除根本煩惱及隨煩惱，善能了解四念處法，求趣涅槃者，斯有是處。

「又復，阿難！若人不斷煩惱，善了四念處，能證七覺支，趣向涅槃者，無有是處。若人斷除煩惱法已，了四念處，證七覺支，趣向涅槃者，斯有是處。

「又復，阿難！若人不斷煩惱，而了四念處，證七覺支，盡苦邊際，趣向涅槃，成緣覺菩提，乃至無上正等正覺者，無有是處。若斷煩惱，了四念處，證七覺支，盡苦邊際，趣向涅槃，成緣覺菩提，乃至無上正等正覺者，斯有是處。」

佛告阿難：

「智者如是，如實了達處非處法。汝等應當如理而學。」

爾時，阿難白佛言：

「世尊！我聞如是未曾有法，得甘露味，深自慶快。世尊！當何名此經，我等云何受持？」

佛告阿難：

「是經名為『四品法門』，亦名『法鏡』，亦名『甘露鼓』，亦名『多界』，如是名字，汝當受持。」

爾時，尊者阿難及諸大眾聞佛所說，皆大歡喜，信受奉行。

【經文資訊】大正藏第 17 冊 No. 0776 佛說四品法門經

【40 華嚴】

大方廣佛華嚴經 卷第二十六

罽賓國三藏般若奉詔譯

入不思議解脫境界普賢行願品

云何福智？謂：施、戒、忍三波羅蜜名之為福；般若波羅蜜名之為智。精進、禪定亦名為福，亦名為智。

謂：因精進修施、戒、忍，慈無量等，則名為福；若因精進起聞、思、修，則名為智。又因精進修「蘊善巧，處善巧，界善巧，緣起善巧，處非處善巧」，能知「四諦善不善法，煩惱勝劣，黑白諸業」，微細觀察，皆名為智。若因禪定修四無量，是名為福；若因禪定修行般若及諸善巧，則名為智。

是故，菩薩能大饒益一切眾生，於諸佛剎大眾會中而為師首，普能隨順一切諸佛轉正法輪；能自調伏，亦能調伏一切眾生，令其速入一切智道。菩薩成就如是種種殊勝因果，即能疾得阿耨多羅三藐三菩提。

【經文資訊】大正藏第 10 冊 No. 0279 大方廣佛華嚴經